

Kelolaan Dewani Abbas
dewani@sph.com.sg

KENAL-KENAL

Lawan Pedang

Oleh NORIMAH ABDUL GHANI

TIDAK ramai gadis yang sanggup melakukan aktiviti yang terlalu mencabar daya ketahanan mereka.

Tetapi itulah yang digemari mahasiswa lasak dari Universiti Nasional Singapura (NUS), Nor Hidayah Mohd Amin.

Selain giat menjalankan kerja sukarela, gadis tinggi lampai berusia 26 tahun itu aktif dalam kegiatan lawan pedang atau *fencing* di universitinya dan juga memiliki lesen memandu bot laju atau *power boat*.

Sambil ketawa, beliau berkata: "Sejak dulu lagi, saya suka mencuba sesuatu yang mencabar, jadi saya cuba-cubalah dapatkan lesen *power boat* tu."


Mahasiswa tahun pertama jurusan Sastera dan Sains Kemasyarakatan ini memang aktif sejak di bangku sekolah lagi. Beliau pernah meraih dua anugerah berprestij — Anugerah Presiden Pandu Puteri atau *President's Guide Award* dan Anugerah Pencapaian Cemerlang Belia Nasional yang setaraf dengan *Duke of Edinburgh Award* di England — kerana pelibatan yang cukup aktif dalam kegiatan luar darjah.

Kedua-dua anugerah ini diterimanya daripada mantan Presiden Singapura, Encik Wee Kim Wee, pada tahun 1989 dan 1992.

"Umur saya baru 17 tahun apabila diberi anugerah presiden itu. Tatkala mendapat tahu tiada pelajar dari daerah timur Singapura yang meraih anugerah itu sejak 15 tahun lalu, saya pun berazam untuk memperoleohnya," terangnya.

Bekas pelajar Maktab Rendah Temasek itu merupakan wanita Melayu pertama yang meraih anugerah yang setanding dengan Anugerah Permaisuri Pandu Puteri atau *Queen's Guide Award* itu. Namun, Nor Hidayah tetap rendah diri dengan pencapaiannya. Malah, pada mulanya beliau enggan untuk ditemu-ramah kerana bimbang dianggap riak dan berpesani berkali-kali agar berita mengenainya 'ditulis baik-baik'.

"Bukan pengiktirafan yang saya minta. Bagi saya kepuasan diri sendiri sudah memadai. Cuma, saya akan berasa cukup gembira jika kejayaan saya ini menjadi contoh kepada anak-anak lain untuk lebih berjaya. Kalau boleh, saya hendak tengok anak-anak Melayu kita terus maju," ujarnya.



Satria Melayu:
Nor Hidayah juga suka memandu bot laju — satu lagi kegiatan mencabar.

Sewaktu menjadi guru sementara di Sekolah Menengah Springfield, beliau turut serta dalam *Operasi Beacon*, sebuah projek kebajikan sekolah itu, dengan *White Cane Club* di mana mereka memimpin sekumpulan orang buta mendaki Gunung Kinabalu.

"Pengalaman pahit manis mendaki Gunung Kinabalu bersama-sama orang buta itu banyak mengajar saya tentang erti kesabaran. Bayangkanlah, sepanjang pendakian itu, kami terpaksa memberi arahan terperinci kepada si buta, maulumlah gunung itu curam," cerita gadis bersuara serak-serak basah, dan bersemangat kental ini.

Baru-baru ini pula, Nor Hidayah memikul tugas selaku pengurus projek dan ahli jawatankuasa pengumuman dalam *Operasi Raleigh Batam 98* di Pulau Bertam.

Operasi gabungan para sukarelawan dari Raleigh International Singapura dan Pasukan Palang Merah Indonesia yang berlangsung dari 29 Ogos hingga 13 September lalu itu, bertujuan menolong para penduduk di sana yang rata-rata miskin.

"Di sana, kami memperbaiki sekolah, dewan masyarakat, perigi, klinik, masjid dan jeti, selain menghulurkan khidmat perubatan kepada para penduduk pulau itu," katanya.

Ini merupakan operasi serupa kedua yang pernah diikutinya. Pada tahun 1996, beliau dipilih untuk menyertai *Operasi Raleigh Batam 96* di Pulau Geranting sebagai seorang sukarelawan. Bahkan, ini merupakan operasi yang cukup istimewa buatnya.

"Masa itu, keluarga saya bercadang mengerjakan umrah. Waktu itulah juga, saya dipilih ke Pulau Geranting. Jadi berbelah-bagilah saya dibuatnya. Lantas saya ambil keputusan mengikuti operasi itu selama seminggu saja. Pulang saja dari pulau itu, saya bergegas berangkat ke Makkah keesokannya.

"Saya diri tak percaya dapat melakukan semua itu dalam masa tiga minggu. Tuhan sajalah yang tahu betapa penatnya saya. Mujurlah, saya diberi kekuatan untuk melakukan ini semua," katanya.

Sebelum melangkah ke NUS, anak sulung dari dua beradik ini telah mengikuti kursus undang-undang luaran dari Universiti London.



"Memanglah idaman saya untuk menjadi seorang peguam, lantas mempraktikkan apa yang saya pelajari. Tapi nampaknya nasib belum menyebelahi saya. Mungkin, belum rezeki," katanya.

Namun, ini tidak bermakna Nor Hidayah telah hilang minat dalam bidang guaman. Beliau begitu gemar membaca buku-buku berkaitan dengan undang-undang, malah menyimpan sebuah buku nota di mana beliau mencatat istilah undang-undang atau apa saja yang menarik dan bersangkutan-paut dengan bidang guaman.

Tentang rancangan seterusnya, beliau memberitahu: "Kalau diizinkan, saya nak ke Nepal dan kalau boleh, jejakkan kaki di *base camp* Gunung Everest pun jadilah. Tentang pengajian pula, Insya Allah saya akan cuba teruskan ke peringkat Kepujian dan seberapa tinggi yang mampu."

NOTA: Penulis ialah penuntut tahun pertama jurusan media massa di Politeknik Ngee Ann.

Sentiasa ceria: Nor Hidayah pernah memimpin kumpulan orang buta mendaki Gunung Kinabalu.



Gemar aktiviti lasak: Nor Hidayah semasa sedang berlatih berlawan pedang di kampus NUS, salah satu kegiatan lasak yang diceburinya.

MUTIARA PELAJAR

Manusia yang terbaik ialah Mukmin yang berilmu. Jika diperlukan dia berguna. Dan jika tidak diperlukan, maka dia dapat mengurus dirinya sendiri.

— Hadis Rasulullah saw (Diriwayatkan oleh Al-Baihaqi dari Abid Darda).